

TILSKIPUN FRAMKVÆMDASTJÓRNARINNAR 2000/41/EB

frá 19. júní 2000

um aðra frestun á banni við því að prófa á dýrum innihaldsefni í snyrtivörum eða samsetningar af slíkum efnum

(Texti sem varðar EES)

FRAMKVÆMDASTJÓRN EVRÓPUBANDALAGANNA
HEFUR,

með hliðsjón af stofnsáttmála Evrópubandalagsins,

með hliðsjón af tilskipun ráðsins 76/768/EBE frá 27. júlí 1976 um samræmingu laga aðildarríkjanna um snyrtivörur ⁽¹⁾, eins og henni var síðast breytt með tilskipun framkvæmdastjórnarinnar 2000/11/EB ⁽²⁾, einkum i-lið 1. mgr. 4. gr.,

að höfðu samráði við vísindanefndina um snyrtivörur og aðrar neytendavörur en matvæli,

og að teknu tilliti til eftirfarandi:

- 1) Meginmarkmiðið með tilskipun 76/768/EBE er að vernda almannaheilbrigði. Í því skyni er óhjákvæmilegt að gera tilteknar eiturefnafræðilegar prófanir til þess að meta öryggi innihaldsefna og samsetninga innihaldsefna, sem eru notuð í snyrtivörur, fyrir heilbrigði manna.
- 2) Aðildarríkjunum ber, samkvæmt i-lið 1. mgr. 4. gr. tilskipunar 76/768/EBE, að banna markaðssetningu snyrtivara, sem innihalda efni eða efnasambönd sem hafa verið prófuð á dýrum, eftir 30. júní 2000 í því skyni að fullnægja kröfum tilskipunarinnar.
- 3) Í annarri undirgrein þessa ákvæðis er einnig mælt fyrir um að framkvæmdastjórninni beri að leggja fram tillögu um að fresta framkvæmd þessa ákvæðis hafi þróun fullnægjandi aðferða í stað dýraprófana ekki skilað viðunandi árangri, einkum í þeim tilvikum þar sem aðrar prófunaraðferðir hafa, þrátt fyrir ákafa viðleitni, ekki hlotið vísindalega fullgildingu þess efnis að þær skapi sambærilega vernd fyrir neytendur að teknu tilliti til leiðbeininga Efnahags- og framfarastofnunarinnar (OECD) um eiturrhifaprófanir.
- 4) Þar eð ekki er um að ræða aðrar vísindalega fullgiltar aðferðir við dýratilraunir og viðeigandi leiðbeiningar um eiturrhifaprófanir á sviði annars konar prófana, samþykktar af Efnahags- og framfarastofnuninni, var nauðsynlegt að fresta í fyrsta sinn dagsetningunni, sem er kveðið á um í i-lið 1. mgr. 4. gr. tilskipunar 76/768/EBE, með tilskipun framkvæmdastjórnarinnar

97/18/EB í samræmi við aðra undirgrein þessa ákvæðis.

- 5) Þrjár aðrar aðferðir hafa verið fullgiltar í Evrópu fram til þessa. Ólíklegt verður að teljast að verulegar breytingar verði í vísindum á þessu sviði fyrir 30. júní 2000. Því ber að fresta í annað sinn dagsetningunni, sem kveðið er á um í i-lið 1. mgr. 4. gr. tilskipunar 76/768/EBE, í samræmi við annan undirlið þessa ákvæðis og 2. gr. tilskipunar 97/18/EB.
- 6) Verið er að taka þessar þrjár aðferðir upp í lög bandalagsins með því að fella þær inn í V. viðauka við tilskipun ráðsins 67/548/EBE frá 27. júní 1967 um samræmingu ákvæða í lögum og stjórnsýslufyrirmælum um flokkun, þökkun og merkingu hættulegra efna ⁽³⁾, eins og henni var síðast breytt með tilskipun framkvæmdastjórnarinnar 2000/33/EB ⁽⁴⁾.
- 7) Í tilskipun ráðsins 86/609/EBE ⁽⁵⁾ frá 24. nóvember 1986 um samræmingu á ákvæðum í lögum og stjórnsýslufyrirmælum aðildarríkjanna um verndun dýra sem notuð eru í tilrauna- og vísindaskyni ⁽⁶⁾ er kveðið á um að ekki skuli gera prófun á dýrum ef annars konar aðferð er tiltæk.
- 8) Því er lögboðið að nota þessar aðferðir í öllum geirum, meðal annars snyrtivörugeiranum.
- 9) Framkvæmdastjórnin hefur lagt fram tillögu að tilskipun um sjöundu breytingu á tilskipun 76/768/EBE í því skyni að finna endanlega lausn á þeim vanda sem tengist dýratilraunum í snyrtivörugeiranum. Slíka tillögu ber að samþykkja með sameiginlegri ákvörðun Evrópuþingsins og ráðsins.
- 10) Að teknu tilliti til þess að búast má við að aðrar fullgiltar aðferðir verði tiltækar fyrir aðrar prófanir á næstu tveimur árum og að tilskipunin, sem tillaga er gerð um, verði samþykkt að þeim tíma liðnum er við hæfi að fresta í síðasta sinn dagsetningunni til 30. júní 2002.
- 11) Ráðstafanirnar, sem kveðið er á um í þessari tilskipun, eru í samræmi við álit nefndar um aðlögun að tækni-framförum á tilskipunum um að ryðja úr vegi tækni- legum hindrunum í viðskiptum með snyrtivörur.

SAMÞYKKT TILSKIPUN ÞESSA:

I. gr.

Í fyrsta málslið i-liðar 1. mgr. 4. gr. tilskipunar 76/768/EBE komi dagsetningin „30. júní 2002“ í stað „30. júní 2000“.

⁽¹⁾ Stjtúð. EB L 262, 27.9.1976, bls. 169.⁽²⁾ Stjtúð. EB L 65, 14.3.2000, bls. 22.⁽³⁾ Stjtúð. EB L 114, 1.5.1997, bls. 43.⁽⁴⁾ Stjtúð. EB L 196, 16.8.1967, bls. 1.⁽⁵⁾ Stjtúð. EB L 136, 8.6.2000, bls. 90.⁽⁶⁾ Stjtúð. EB L 358, 18.12.1986, bls. 1.

2. gr.

1. Aðildarríkin skulu samþykkja nauðsynleg lög og stjórn-sýslufyrirmæli til að fara að tilskipun þessari fyrir 29. júní 2000. Þau skulu tilkynna það framkvæmdastjórninni þegar í stað.

Þegar aðildarríkin samþykkja þessar ráðstafanir skal vera í þeim tilvísun í þessa tilskipun eða þeim fylgja slík tilvísun þegar þær eru birtar opinberlega. Aðildarríkin skulu setja nánari reglur um slíka tilvísun.

2. Aðildarríkin skulu senda framkvæmdastjórninni ákvæði úr landslögum sem þau samþykkja um málefni sem tilskipun þessi nær til.

3. gr.

Tilskipun þessi öðlast gildi á þriðja degi eftir að hún birtist í *Stjórnartíðindum Evrópubandalaganna*.

4. gr.

Tilskipun þessari er beint til aðildarríkjanna.

Gjört í Brussel 19. júní 2000.

Fyrir hönd framkvæmdastjórnarinnar,

Erkki LIIKANEN

framkvæmdastjóri.